

## **TIMOR-LESTE KONKLUI ONA SOSA ASAUN CONOCOPHILLIPS NO SHELL ENERGY: PM-TMR “2025-2026 BELE FA’AN ONA MINA”**



Dili, 16 Abril 2019 : Governu Timor-Leste, kuarta-feira ohin iha Singapura konklui ona hala'o tranzasaun pagamentu ((letter of completion") hodi sosa asaun partisipasaun kompañia Petrolífera ConocoPhillips no Shell Energy iha atividade Petrolífera Greater Sunrise nian, liuhosi Representante Especial Governu nian, Kay Rala Xanana Gusmao.

Tanba ne'e, Primeiru-Ministru Taur Matan Ruak hateten, apartir kinta-feira semana ne'e, Timor-Leste halo parte ona sai na'in iha konsórsiu liuhosi Timor-GAP-EP hodi halo atividade preparativu sira atu prosesu hotu-hotu ne'ebé planeia ona bele la'o ho di'ak, ne'ebé tuir previzaun iha tinan 2025-2026 Timor-Leste bele fa'an ona produsaun mina no gás hosi projetu Greater Sunrise.

"Ohin asina ona, ne'ebé hahú aban ita halo parte ona, Timor-Gap halo parte hanesan konsórsiu ba Greater Sunrise, naturalmente tuir mai ne'e ita sei halo atividades preparativos depois prosesu ne'e bele lao ba oin, hanesan previzaun katak to'o 2025 -2026 ita komesa fa'an mina", dehan Xefe Governu ba jornalista sira hafoin remata enkontru semanal ho Prezidente Repúblika, tersa-feira ne'e iha Palasiu Prezidente Nicolau Lobato.

Xefe Governu hatutan, iha ne'e ba oin Governu, liuliu parte sira ne'ebé involve iha prosesu ne'e sei esforsu serbisu barak loos atu nune'e bele konkretiza planu ne'ebé iha ona.

Ho finalizasaun transferénsia pagamentu 650 millaun dólar amerikanu ba asaun partisipasaun ConocoPhillips no Shell Energy nian iha atividade Petrolífera Kampu Greater Sunrise nian, mak Timor-Leste ba oin kontrola ona asaun 56% ba Kampu Greater Sunrise liuhosi Kompañia estatal Timor Gap-EP iha konsórsiu.